

# Tschintg babs vulan ina canorta rumantscha a Turitg

Da preschent marschan discurs cun in purschider grond

CUN REMO PFISTER HA DISCURRÌ  
CLAUDIA CADURUVI

■ **La canorta rumantscha a Turitg duai esser averta per uffants da tuts idioms. Ella sto sa chattar en in lieu central – il meglier damanaivel da la staziun principala. Uschia tunan ils plans da tschintg babs motivads ed in pau giagliards.**

**ANR: Per tge motiv vulais Vos ina canorta rumantscha a Turitg?**

**Remo Pfister:** Igl è in pau idealissem, ma forsa era in tschert egoissem. Nus essan tschintg babs e lain dar vinavant il rumantsch a noss uffants. Els creschan si a Turitg en in ambient tudestg ed els vegnan ad ir a scoletta e scola tudestga. Per part vegn discurre a chasa plitost tudestg che rumantsch. Nus manegiain ch'i gidass d'avair – sper ils babs che discurren rumantsch cun ils uffants – ina canorta che purschess in conturn nua ch'i vegn era discurre la lingua. Quai è l'idea.

**Tgi fa part da Vossa gruppa?**

Nus essan tschintg babs che avain gi l'idea. Quatter èn creschids si en Surselva, in a Domat. Nus essan circa da la medema vegliadetgna – plus minus quarant' onns - avain uffants giuvens ed essan tuts maridads cun ina dunna che na vegn betg da la Rumantschia. Uschia discurre il bab rumantsch e la mamma per gronda part tudestg cun l'uffant. Nus lain tuts sa spruvar da dar vinavant la lingua.

**Co èsi tar Vos a chasa?**

Mia dunna vegn da Basilea-Champagna. Jau sun sco sulet da nus tschintg en la situaziun confortabla che mia dunna ha emprendì rumantsch e discurre per gronda part era la lingua cun ils uffants. Ma mes collegas n'han betg quest «luxus».

**Quant vegls èn Voss uffants?**

Nus avain duas buobas. La veglia ha dus onns e la pitschna quatter mais.

**Avais Vos fin uss fatg mo plans u gia interpredi insatge?**

Interessant è che l'idea vegn dad ina da nossas dunnas, dad ina Turitgaisa. Daco



«Nus stain vidlonder ed essan motivads», di Remo Pfister che lavura tar la UBS. El è in dals tschintg babs che vulan ina canorta rumantscha a Turitg.

FOTO C.CADURUVI/ANR

na faschais betg ina canorta rumantscha?, ha ella dumandà ses um. Il collega è vegnì da motivar ils quatter auters. Forsa in onn è l'idea stada preschenta enfin che nus avain fatg pass concrets. Ina saira essan nus vegnids ensemen a baiver ina gervosa e vain gi endament co far. Nus avain fatg in pau brainstorming: far sez ina canorta u lavurar ensemen cun in'existentia etc. Nus avain spert vesì che nus stuain evaluar, quant grond che l'interess è insumma. Essan nus simplamain mo idealists? U datti anc plirs che han il medem giavisch?

**Vus avais infurmà l'entschatta da la stad cun in email circular via «posta rumantscha».**

Quai è l'emprim che nus avain fatg e nus avain gi reacziuns da las medias.

Sco emprim ha in schurnalist dal «Bündner Tagblatt» reagì. Suenter èn ils radios s'annunziads e lura hai dà in artigel en il «Tages-Anzeiger». Gliez ha fin uss purtà il pli bler. Entras quai essan nus propi stads preschents en la gasetta che vegn legida en l'entira citad da Turitg. Sin quai avain nus survegnì intgins novs interessents.

**Vus essas pia betg mo tschintg idealists cun in'idea?**

Na, ils tschintg idealists han sez otg uffants. Da quels vegnan sis en damonda per la canorta. Uss vegnan vitiers anc quatter uffants e trais che neschan proximamain. Plaunsieu vegnin nus da bajegiar si in'uschènumnada pipeline. Quai è ina vart: vegnir ensemen cun interessents. Da l'autra vart vegnan noss

plans plaunsieu pli concrets. Nus avain gi gia differents discurs cun in purschider grond che maina pliras canortas en la citad da Turitg. Quel fiss pront da lavurar ensemen cun nus. Co che quai vesa ora en detagl, per exempel tgenins disch'ins purschess per rumantsch, gliez sto anc vegnir discutà ils proxims mais.

**Trair si sez in'atgna canorta na vegn betg en dumonda?**

Per esser sincer n'è quai mai stà nossa emprima finamira. I va a nus per la purschida. Nagin da nus ha experientscha da manar ina canorta. Perquai èsi blier pli simpel, sche nus pudain lavurar cun ina canorta existentia.

**Avant intgins onns, cura ch'i na deva anc betg avunda canortas a Turitg,**

**han per part geniturs sez organisà ina.**

Ma ozendi datti tantas canortas a Turitg. Quasi mintga mais avra ina nova.

**Co statti cun il persunal? Aves il purschider cun il qual Vos stais en contact gia glieud che sa rumantsch?**

Sin l'email en la posta rumantscha è ina persuna s'annunziada. Autras persunas dal fatg stuessan nus anc tschertgar. Quest purschider guarda uss ina giada, sch'el ha forsa gia educaturas rumantschas.

**En Voss email scrivais Vos che la canorta stuess esser damanaivel da la staziun principala. In tal lieu lesan gea tuts! N'è quai betg in pau giagliard?**

Quai è uschia. Il purschider cun il qual nus discurren avess ina canorta damanaivel dal Stadelhofen – betg gist a la staziun principala, ma tuttina sper ina da las grondas staziuns a Turitg. Gliez na fiss segir betg mal. Forsa essan nus schon giagliards, ma ins sto vesair: Nus na pudain betg esser memia fitg giud via. Igl è gia grev avunda da motivar geniturs. Betg tuts abiteschan en il center. Ils blers vegnan a far in tschert effort per insumma vegnir cun ils pops – saja quai perquai ch'els han in viadi pli lung u saja quai perquai ch'els ston s'adattar cun il di damai ch'ins na po betg porcher mintga di rumantsch. En quest regard pretendain nus ina tscherta flexibilitad dals interessents. Da l'autra vart na pudain nus betg far vegnir tut ils geniturs ad Oerlikon u ad Altstetten cun ils uffants.

**Tge èn il proxims pass?**

Nus stain vidlonder ed essan motivads. Tge che nus avain percurschì è che nus tschintg stuain s'organisar in pau meglier. Perquai ha mintgin surpiglià in ressort. Nus avain era en senn da forsa fundar in'unìun.

**Interessents pon prender si contact cun Remo Pfister: remopfister@gmx.net, 079 961 40 46.**